

四庫全書

集部

欽定四庫全書

集部

文忠集卷一百二十三
四

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣李如梓

欽定四庫全書

文忠集卷一百二十三

歷官表奏二

宋 周必大 撰

淳熙二年

謝侍講表

臣某言伏奉告命除臣兼侍講者一趨經席已稱韋布之榮參脩綸言豈厭搢紳之望凌競祇命俯仰懷慙臣某中謝臣竊以天縱之能陋儒絕企日躋之聖典學何

加然且躬有虞好問之勤守大禹不矜之戒正使昔人之博洽尚難稱於在前矧如淺識之支離顧何堪於拜下而臣逢時十一冒寵再三曩睽南省之班嘗執經於累月比候西清之對復隸職者半年逮此叨踰愈為榮幸茲蓋伏遇皇帝陛下聖而益聖新以又新舒兩曜於天衢猶許爝螢之曳納百川於溟海不辭潢潦之歸是使顓蒙荐陪誦說臣敢不欽承異禮勉竭孤忠無力可陳雖未觀於寔效有猷則告庶少塞於空餐臣無任

辭免兼詹事奏狀

右臣準尚書省劄子十月十八日三省同奉聖旨差臣
兼太子詹事者錫命自天措身無所臣竊惟儲端華重
今昔所同漢韋賢質樸篤學始膺委任唐李勣至以舊
長史屈階資而為之近歲以來非老成端諒卓然為世
所推則必於近臣中擇嘗任王府講讀及宮僚者就兼
是職苟或異此寧虛厥官如臣不肖行能淺薄既無素
望又非舊人驟預選掄寔駭羣聽此臣所以彷徨震怖

不敢自恕而但已也伏望陛下重青宮之屬軫黃屋之思勿以反汗為難而以掄材為急朝多英望亦有舊僚改而命之庶協公論冒輸懇悃必冀矜從干犯宸嚴臣無任屏息待罪之至謹錄奏聞伏候勅旨

不允詔

權中書舍人程大昌被旨撰

勅某省所奏辭免兼太子詹事恩命事具悉朕簡宮僚非正人不與卿踐履端尹廼衆論所宜攬觀推遜之言具詔卑牧之意李勣之屈資受委曰求舊則有

之綺里之偉冠從游亦博致為貴矣其務究思於輔
翼是云有益於元良豈必辭榮始名美德所辭宜不
允故茲詔示想宜知悉

東宮賀冬牋

某言伏以漢朔無差上應太初之神策堯年有永載隆
德壽之鴻名允哉貳極之賢同此兩宮之慶某誠懼誠
忭叩頭叩頭恭惟皇太子殿下位尊儲副德茂元良雷
復地中契義爻之洊震日行巽軌符漢樂之重光剛以

朋來福繇類至某甫趨鶴禁欣贊羽冬南極景長願從
容於五學少陽道長知消伏於羣陰謹奉牋稱賀以聞
某誠懼誠忤叩頭叩頭謹牋

淳熙三年

東宮賀正牋

氣動青煒肇布發生之德地居蒼震密參化育之功履
茲端月之和篤我儲儀之慶中賀恭惟皇太子殿下象
符明兩朝謹日三龍角連杓陪龍樓之元會雞鳴列戟

辭免書韓世忠神道碑劄子

右臣準尚書省劄子備奉聖旨差臣書韓世忠神道碑
文者臣仰惟陛下親御翰墨大書世忠碑額非特寵綏
韓氏亦將丕勸勲故譬之龍螭鳳翥昭回於天豈容春
蚓秋蛇附見其下伏望聖慈特賜追寢別擇能書者而
命之臣不勝幸願謹錄奏聞伏候勅旨

四月三日三省
同奉聖旨不允

繳書神道碑劄子

臣先奉聖旨差臣書韓世忠神道碑今已寫成一軸謹

以進呈惟是字畫非工無以仰副陛下追褒勲舊之意
寔深震懼伏取進止

八月二十三日奉
聖旨降付本家

辭免潤筆劄子

臣今月二十九日得戶部侍郎韓彥古劄子以臣先奉
聖旨書其父韓忠武王世忠神道碑文送到金器二百
兩充潤筆雖云躬承睿訓繼奉御筆許齎賜然臣義有
未安湏至奏免臣竊考自古人君追褒勲賢多命儒臣
紀載事寔必有濡潤用酬撰述之勞至於書丹本是待

詔職事近年乃出土大夫之手仁宗時偶因御製元舅
隴西郡王碑文詔蔡襄書之襄以御製不敢辭避其後
詞臣別有所撰又命襄書襄即懇免臣書札素非所長
昨命為韓氏寫碑正緣陛下追念勲臣大書碑額臣輒
泐蔡襄故事不敢固辭今若違前世所無之規循近年冒
受之例則不惟捨是從非取誚公論亦恐傷廉苟得上
負聖知伏望睿慈察臣悃悞恕臣冒瀆特降指揮許臣
免受取進止

奉御筆批依例
收受不須懇免

謝劄

臣昨具奏辭免韓彥古賚賜書碑潤筆金器二百兩恭
準御筆令臣依例收受不須懇辭臣伏讀以還寔深感
懼因思自初差委及今送遺皆出陛下之意臣豈不知
若復控辭祇成煩瀆即已遵稟聖訓祇受訖予惟馭幸
誠戴於上恩取或傷廉終慚於物議尚推隆施期報洪
私臣無任激切惶恐之至謹具劄子奏謝伏乞睿照

辭免陞兼侍讀奏狀

右臣準尚書省劄子節文九月二日三省同奉聖旨周
某陞兼侍讀者誤膺褒渥伏積兢惶臣竊以入侍邇英
均為清近然而進讀之選重於執經多處大僚兼優宿
望如臣者猥繇孤賤蚤被簡知首尾六年三陪講席無
一詞發揮經訓無一事裨贊聰明內愧心顏外貽譏誚
豈可偶因官闕更冒次升人以為榮臣以為懼伏望皇
明日照聖度天容察臣非才恕臣量已別選在列庸求
多聞毋令陋儒並壅賢路所有恩命臣未敢祇受謹錄

奏聞伏候勅旨

九月六日三省同奉聖旨不允令學士院降詔

不允詔

勅某省所奏辭免陞兼侍讀恩命事具悉朕惟祖功宗德炳若日星聖烈神謨垂之琬琰每懷仰止常切慨然思得崇閣博碩之儒庶資論說指陳之要卿識周治本學探道原經幄誦言稔直諒多聞之益禁林視草揆溫厚爾雅之文爰陞進於露門益發揮於寶訓昔司馬侍邇英之讀具陳變法之規蘇軾兼金華

之榮亦著六事之美其母多遜式企前修所辭宜不
允故茲詔示想宜知悉

謝侍讀表

臣某言伏奉告命陞兼侍讀者執經充數未絕業於金
華進讀升班首侍言於帝幕拜恩加厚省已何安臣某
中謝臣聞選儒士以資疑本唐室開元之際閱史編而
顧問在皇朝興國之年肇立官稱助成治道矧明主夙
勤於聖學舉羣臣難跂於末光凡陪清燕之遊尤號高

革之選縱未得故老宿儒之重入告於辰猷尚當求洽
聞博物之英少資於晝接豈臣孤陋堪此褒遷茲益伏
遇皇帝陛下文武生知聰明日就二帝三王之行事久
矣優為六經諸子之格言居然深造更思愚者之千慮罔
伏小人之攸箴故雖非重席之才亦許冠細旃之列庶
因駿骨或致龍媒臣敢不圖報洪私益堅素守典墳能
讀深慚倚相之良仁義以陳勉效孟軻之敬臣無任

辭免吏部侍郎奏狀

右臣準尚書省劄子節文十二月二十四日三省同奉
聖旨周某可除吏部侍郎日下供職者寵命過優震惶
失措臣竊惟六官置貳職任俱隆有唐三百年暨本朝
元豐以後或隨材互轉或因事遞遷固有周歷列曹亦
有自戶禮而轉兵刑者旋觀歷試倚重則均矧是東銓
古稱小宰選掄既遴位序益高豈伊妄庸堪此隆委伏
念臣蒙陛下識拔最早叨陛下爵祿最厚而才力議論
比之在廷諸臣最為無取再塵武部僅及一年有半攷之

故事未為久次加之身兼三組備極清華內揆非才不
皇寧處豈謂驟膺簡擢進預銓衡抑揚之間聖主所當
致審辭受之際微臣敢不自量伏望陛下深亮懇誠無
嫌改命別求精鑒俾佐治官免貽非據之譏仰累知人
之哲所有恩命臣未敢祇受謹錄奏聞伏候勅旨

不允詔

勅某省所奏辭免除吏部侍郎恩命事具悉朕惟六
卿貳列其選固皆不輕然武部典掌五兵而職或優

暇小宰銓叙羣才而事多叢委與其蓄餘蘊而處優
暇之地孰若升剡寄而資鑒裁之公哉卿資之所稟
者既高學之所養者益富代言禁苑進讀露門翊東
儲而列西銓四職並舉而沛乎其有餘裕肆是命卿
參吾典選之政令庶藉其通明以清流品推其精敏
以捭姦欺用稱吾綜核之意其何以辭為也所辭宜
不允

謝吏部侍郎表

臣某言伏奉告命授臣試尚書吏部侍郎仍賜對衣金帶者嚴近叨居夙負瘵官之責武文迭試更膺換部之榮襲衣頒在笥之珍寶帶錫章身之寵仰慙主眷俯愧輿言臣某中謝臣聞古之銓綜存乎人今之銓綜一於法存乎人固可以得士然其弊也常由予奪之不公一於法固可以滅私然其弊也或致賢愚之同滯而况簿書紛若胥吏雜然苟稽察之弗精將混淆而莫辨欲酌古今之中制當令人法之並行庶稍戢於吏姦亦少伸

於士氣豈容虛受以累明揚伏念臣性鄙習迂志卑才
下蚤親翰墨但為書生陳腐之談久侍軒墀初乏禁從
論思之語引去則殊私之未報留則高位之難安方進
退之靡寧忽選除之下逮肺腑抱履冰之懼面顏形撻
市之羞被此光靈若為稱塞茲蓋伏遇皇帝陛下乾行
不息日照無私知人非堯帝之難巧壬奚患選衆有臯
陶之舉枉直自分夫何一介之臣乃冠貳卿之列臣敢
不遵承法令振拔滯淹雖微冰鑑之明上裨睿哲姑守

權衡之信仰助公平苟不辱知斯為報國臣無任

舉自代奏狀

右臣伏見朝散郎守尚書兵部郎中賜緋魚袋蘇諤修身有家法臨事無私心即省二年靖共厥位臣在夏官久與同僚脩知其人臣寔不如舉以自代

請外劄子

四月二十六日請對既至漏舍疾作不曾上

臣自蒙聖恩召還禁路遷擢再三未有絲髮可報生成之造豈應輕為去就辜負聖知緣臣有迫切之懇須至

披露於君父之前伏念臣少孤多難依諸父以自存臣之叔有二子自來同居前年臣到闕之時李忽夫折尚餘其長未至狼狽不謂三月間又復即世兩房嫠婦幼子全闕撫養臣欲挈取以來則二千里之遠勢不能辦若置而不問則於心豈能自安晝夜忖度莫知所措惟有乞奉外祠可以少致私義伏望聖慈憐臣受祿過分事出意表察臣受恩方厚情非獲已特降睿旨俯從所請糜捐之報尚冀它時干犯震嚴伏俟誅戮取進止

吏部侍左進天中郎功德疏右語

三紀施仁固獲延年之報萬方懷德矧多祝聖之人茲
當虹渚之昌期載演鷲峰之密義尊號皇帝伏願雍容
太極覆燾含生福等河沙誠非算數之及壽同無量永
作天人之師

東宮賀冬牋

周統得天布時王之正朔漢郊迎日對元祀之祺祥允
符陽德之亨虔致震宮之慶中賀恭惟皇太子殿下道

隆三善瑞應重光泰時親祠既已儲休於上聖貳觴嘉
獻自宜介祉於元良與國無窮如天有永某會逢亞歲
託脩下僚輔翼無功虛度舒長之圭影徃來有象願觀
動靜於天心

淳熙四年

東宮賀正牋

星回於天載測璇璣之度王省惟歲重頒寶曆之春萬
宇咸熙三宮交慶中賀恭惟皇太子殿下內全仁孝外

脩溫文日就月將德與年而俱永天長地久福暨祿以
偕昌邁監撫之前聞契壽臧之善頌某欣逢令序延跂
英規丹鳳虔趨方參聯於百職銅龍祇謁尚續罄於多
懽

辭轉官奏狀

右臣準尚書吏部牒脩奉三月二十四日勅以臣經修
徽宗皇帝寔錄見在行在供職特轉行一官者無功假
寵有覲在顏伏念臣頃以庸虛叨塵史職空更歲月莫

施鉛槧之勞茲者偶值奏篇例當進秩揆之公論咸謂
過優在於私心寔難冒受伏况樞臣懇避宸旨賜俞雖
則名位不同不當援以為請然昔人謂范宣子遜其下
皆遜鬻雖汰弗敢違也今臣縱乏晉卿之義豈不思
自附於鰲乎伏望聖明矜其誠悃非脩禮而辭者特詔
攸司追寢前命庶幾賞行不僭抑使愚分獲安冒犯天
威臣無任惶懼戰汗之至謹錄奏聞伏候勅旨

奉御筆
批降詔

不允

不允詔

勅某省所奏辭免經修徽宗皇帝寔錄特轉行一官
恩命事具悉惟昔徽皇撫時熙運繼六七作之聖業
鉅事叢成二百篇之書文直義挾茲覽編年之善具
嘉秉筆之工凡預纂修靡遺褒錄卿才追遷董添掞
卿雲紉金匱石室之藏居多論載迄汗簡殺青之業
綽有勞能逮此奏篇於焉第賞而乃慕范宣子之義
巽以成風師正考甫之賢恭而有禮雖高謙益難遏

渙行所辭宜不允故茲詔示想宜知悉

辭免翰林學士奏狀

右臣準尚書省劄子五月二十八日三省同奉聖旨除
臣翰林學士日下供職者超遷逾分震懼靡寧臣竊以
列職禁林本朝所重陛下聖學天縱宸文日新故於此
官尤不輕畀竊計十六年間除授總五六人可以知其
選矣如臣見聞單淺翰墨荒唐誤簡異知徧塵華貫一
自攝承視草首尾僅及六年適有天幸再逢加上德壽

尊號兩經郊祀大禮制誥典冊往往涉筆其間是皆當
世儒先跂望而不可得者臣獨有此榮遇日夜惴恐自
知無以稱塞此因入對反誤褒嘉且復再三諭以因文
字進擢之意臣方踧踖退避翼日已奉除書雖陛下崇
獎詞臣務隆恩渥在臣分量盈溢寔非所安而况寓直
於中足以効薄技賦祿之厚固已視真除何必捐久虛
之官重至愚之累此臣所以不避煩瀆而為是諄諄也
伏望聖慈俯昭誠悃特寢成命姑即銓衡之舊仍宣潤

色之勞圖報大恩有隕無貳所有恩命臣未敢祇受謹

錄奏聞伏候勅旨

奉御筆批
降詔不允

不允詔

權直院程叔遠撰

勅某省所奏辭免除翰林學士恩命事具悉朕惟禁
林夙號真清學士尤為妙選蓋命令之發將以鼓天
下之動而播告之修於以見王者之心非高其才者
冒擅斯長非裕於學者冒勝茲任卿斧鑒其德圭璋
乎文翰墨舊游嘗屢參於潤色典冊大筆仍多自於

裁成灝噩鎔冶乎誥盤溫厚轡轡乎漢魏倚金華而
上白玉久勤寓直之勞邈太清而凌紫霄爰即為真
之拜除音一下僉論允諧宜亟體於眷懷胡尚形於
巽避所辭宜不允故茲詔示想宜知悉

宣召節次

至日絕早待詔客位坐伺候內翰近出廳待詔先至
面南香案側立請內翰出笏至香案前面南立引接
喝躬身兩拜起拜訖且躬身有勅聽待詔讀口宣畢

再兩拜起拜訖直身搢笏引接供過謝宣召奏與內翰即
過與待詔即却過與表奏官通進司投下引接虛喝
依例待詔馬下錢一千貫近例不曾喝引接喝內翰
馬到請內翰乘馬後待詔乘馬宣押入皇城門至院
中到臺下馬引接隻引明廊喝內翰來至堂內升座
引接兩邊立第一喝王從闕已下躬身應喏聽喝各
祇候再應喏退第二喝劉大聲已下躬身應喏聽喝
各祇候再應喏退第三喝待詔躬身應喏退畢內翰

起親事官接公裳歸閣子

口宣

有勅卿文詞瞻蔚學術純深擢位禁林斷繇朕志宜
因到日亟服殊休今差忠翊郎待詔錢滋宣召卿入
院充學士想宜知悉

謝宣召入院表

右臣今月十三日忠翊郎學士院待詔錢滋至臣所居
奉宣宸旨召臣入院充學士者君命及門趨正鑾坡之

直王人馳騎驟增蓬戶之光在稽古以何功繫逢辰而
有幸瞻威咫尺流汗再三伏以地重禁林職專內制唐
朝全盛初置院以名官聖代承平尤隆儒而假寵諮報
施於政省勅設具於大官霜日冬嚴候五軌而入直暑
風夏永盡三伏以蚤歸凡茲異數之加絕匪羣司之比
竭從南渡重敞北扉仍每厚於恩章示無忘於典則賜
玉堂之篆已追淳化之風揭擣文之名更用政和之制
佩服煥兼金之飾宮庭還雙導之儀地既近而職親俸

良優而事簡惟重其官則擇人也審惟尊其禮則責報也深凡政事之否臧若兵民之利害大而除授於將相次則討論於古今皆因燕閒得以獻替諒非鴻博難預選掄如臣者骨相多屯才華弗競所宜遯遯躬耒耜於田間何意代言鼓雷風於天上誤結九重之眷冒膺三入之榮居慚起草之非工寧復為真之敢望茲蓋伏遇皇帝陛下聖謨獨運睿智日躋煥乎文章紹則天之堯帝倬彼雲漢邁作人之周王既集大成尚收小技臣謹

當推原德意播在訓詞雖愧百篇垂坦然之帝制或令
萬姓識一哉之王心臣無任感恩荷聖激切屏營之至
謹錄奏謝以聞謹言

謝表

臣某言伏奉告命授臣翰林學士知制誥以今月十四
日朝謝訖者佐銓南省已辱超遷裁詔北門更膺宣召
絲綸寵甚簪黻榮之伏念臣名習藝文寔踈學業竊方
流輩最軫眷憐兩制清華並叨於再直六曹要劇五攝

於貳卿積有恩私畧無補報窺陳編而盜竊懼于聖主
之誅奏薄技以精思愧忝從官之內敢期宸渥真踐禁
扉此蓋伏遇皇帝陛下欽明文思剛健中正學古多聞
乃有獲發號施令罔不臧何取顓蒙亦令親近臣敢不
勉殫愚鈍仰答聖明視淮南之書豈但矜誇於下國聽
山東之詔固當裨助於中興臣無任

舉自代奏

右臣伏見承議郎權江南西路轉運判官趙汝愚奉親

孝謹勵志忠清方陛下作成宗支汝愚首以文學超冠
多士分符持節又皆底績若寘詞禁足為華國臣寔不
如舉以自代謹錄奏聞伏候勅旨

謝衣帶鞍馬表

臣某言伏蒙聖恩以臣朝謝賜臣衣一對金帶一條并
魚袋金鍍銀鞍轡馬一匹者笥衣有煥束以九環坵牡
甚良分之六轡被躬雖寵稱德多慙伏念臣乏黃絹之
辭起白駒之谷褐衣褐見莫陳漢戍之便宜馬去馬歸

敢計塞翁之倚伏竊尋唐事獨貴詞臣候對於受宣之時拜恩於就宴之日服頒內庫駟假飛龍蓋嘗夢想於儒榮豈謂親承於聖澤此蓋伏遇皇帝陛下解衣待士馭朽臨民垂虞舜之裳坐安天下市燕昭之駿期致賢人故假服章以華駑鈍舉一箱於家廟莫追親膝之歡盛七事於禁林徒荷君恩之寵臣無任

右制誥表章一卷錄寄顧顓二從孫為他日齊飛入禁之勸尚期勉旃期無愧於古人勿效叔翁不學少

文徒能依本畫葫蘆耳淳熙四年六月十五日

先公除翰林院制詔表章題曰鑾坡錄今誥詞已
載年譜表章又入此卷故附見跋語於後云綸謹
書

文忠集卷一百二十三

欽定四庫全書

文忠集卷一百二十四

歷官表奏三

宋 周必大 撰

淳熙四年

辭免兼修國史奏狀

右臣準尚書省劄子節文七月二十七日三省同奉聖旨差臣兼修國史者揆才非稱聞命若驚竊惟建官以六大為先寔尊載筆作樂以一變而足所貴專門若時

聖代之信書方藉春卿之精識

時李燾以禮侍同修國史

明是非於

五紀昭功德於四朝自非荀袁鴻鴈之行寧脩遷固馬
牛之走如臣者含毫無取濫吹有年紹興是正書林嘗
參於編次乾道躋攀禁路復貳於纂修建茲三八之榮
益厚九重之眷然而叨塵數職懼力難任度越宿儒隱
心尤愧伏望陛下擴大明而委照矜小技之知難書成
專屬於名家虛次姑仍於舊貫免令尸素反滯汗青干
犯宸嚴臣無任震懼俟命之至謹錄奏聞伏候勅旨

不允詔

勅某省所奏辭免兼修國史恩命事具悉甚矣夫史
筆之難也以馬遷之良才而是非頗異於聖人以韓
愈之碩學而竄定迄無於全篇自非一代儒英兼脩
之長者未易稱其選也豈無若人足以矯斯弊而擅
斯美哉卿博極羣書尚友千古其於文學才識固已
淵渟涵蓄於胸中而施之論思潤色之間亦已沛然
其有餘肆是命之兼典史事庶幾交輝並映筆削財

成作宋一經高視漢唐而無愧推遜之章過形謙避
雖嘉冲尚殆難徇夫雅懷也所辭宜不允故茲詔示
想宜知悉

舉李塾賢良不應格待罪劄子

臣昨任敷文閣待制日曾同王淮荐舉眉州布衣李塾
堪應制舉後來王淮為執政其李塾詞業係臣繳進緣
止蒙恩召試今聞李塾所試六論率不應格無以副陛
下孜孜求士之意罪無所逃欲望聖慈特賜絀責以懲

謬舉取進止

九月三日奉
御筆放罪

東宮賀冬牋

氣運環周雖分二至古今交慶獨在一陽偉儲德之又
新紛休祥之參集中賀恭惟皇太子殿下挺姿岐嶷率
性溫文學常愛於日舒道每符於剛長漢殿八能之會
祇率羣公魏基三世之言永扶昌祚天人有相福祿無
疆某叨侍承華載逢令旦其為欣頌倍萬常均

淳熙五年

東宮賀正牋

玉燭時和方輦臨於首序銅樓氣淑淑宜交集於殊禧喜
浹宮庭慶均家國中賀恭惟皇太子殿下聰明異稟仁
孝夙成在宮曰春助發生於天地於卦為震悅簡易於
乾坤竊嘗推類以求端益信對時而受福某久陪漢苑
載值夏正因頌詠以輸勤越等倫而竊忭

乞郡劄子

臣某輒控愚誠仰干天聽臣一介庸妄初乏寸長陛下

陶成獎擢有年於此寅緣忝冒遂塵翰苑清資駢組極
儒生之榮遇而臣文辭鄙樸既無以潤色皇猷議論尪
怯又無以裨補聖治妨賢竊位辜負眷知慚悸熏心忸
怩健忘凡遇撰述殊覺窘艱今又侍從近臣皆曾經歷
州縣獨臣超躡過分未嘗服勤於外每一念此尤不皇
寧而况再侍軒墀首尾四載稽參故寔亦當從更迭之
制疊是三者懷不能已躊躇浸久乃茲有請非敢為輕
去就而無犬馬之戀也伏望陛下博施鴻造洞照孤衷

特捐小郡試以民事使其心粗安則病或愈任稍輕則力可強銜恩報德中外何殊冒犯威尊伏俟鈇鉞取進

止

正月二十五日奉
御筆降詔不允

不允詔

兼權中書舍人劉孝驥撰

勅某省所奏劄子乞特捐小郡試以民事具悉卿以粹美之資蚤膺文學之選晉登詞禁益鬯聲華以潤色則素長以議論則甚偉凡自託於不敏皆汝為之有餘況兼疊組之榮方極一時之遇胡為剡奏力詭

治民夫意在本朝如蕭望之願為中郎若汲長孺皆
篤愛君之義不以居郡為多矧卿眷倚優隆職任親
近其體昔人之志毋懷外補之安所請宜不允故茲
詔示想宜知悉

再乞外任劄子

翰林學士朝議大夫知制誥兼侍讀兼太子詹事兼修
國史臣周某劄子奏臣近披誠懇控告君父乞乘一障
少効駑力伏蒙陛下訓獎再三諭使安職王音濬發蹇

訥自窮繼頒溫詔曲示優禮臣草芥微生何以仰稱天
造感悰既極哀涕自零豈應固守不移之愚身投砧質
緣臣辭有未盡不免觸冒萬死再塵淵聽竊以職親地
禁參被諮詢非常更歷中外未易當此高選其居之者
亦以高官厚祿徃徃不敢為久安計前代故事難於徧
舉姑以本朝觀之德望如李迪猶歷永興軍陝西都轉
運使而後用文采如陳堯佐猶數典名城四為職司而
後入又如歐陽修在此職乞洪州者七狀蘇軾數月間

乞守越者八章載在史冊蓋可覆視今臣於民情吏事
全不諳曉而冒居華序淹引歲月既憂顧問之際語塞
獲譴又恐久妨賢路招致人言是以朝思夕慮審而後
發陛下明並日月必賜矜照且人臣不自安於朝廷之
上者其說有二若非明主厭薄慮貽罪斥則或多結仇
怨諛嫉是虞今陛下待臣方厚獨專內直臣亦素不預
事與人無怨於茲有請竊謂無嫌此外寔懷私心不敢
輒隱臣本章句腐儒其初志在一第金華玉堂夢想弗

及豈期遭遇併此冒居兼數年以來遷擢頻數常懼踰
涯別致灾咎冀因外補少逭隕越言而非寔是謂欺君
縱陛下容而恕之神明亦將致殛矣意迫辭煩仰祈賜
可干犯疏宸臣無任戰慄俟罪之至伏取進止

正月二十七日

奉聖旨依已降詔不
允不得再有陳請

奏謝劄子

臣昨再具奏乞從外補準尚書省劄子脩奉聖旨依已
降詔不允不得再有陳請臣仰銜眷遇感深涕隕已恭

稟聖訓依舊供職俟他日請對別叙戴恩引分之意謹
先具劄子奏謝伏乞睿照

再乞去劄子

閏六月十四日

臣輒披誠悃上瀆宸嚴臣受材至下賦分至薄而叨被
眷憐至厚嘗懼無以報塞自貽罪戾近於五月四日懇
祈外補少逭隕越玉音眷留脩極恩意臣感戴殊私深
願竭力文字間圖報萬一而臣舊苦心氣之疾近忽大
作悸眩虛乏終日困卧遇有書詔思索移時不能下筆

將何以潤色皇猷上副睿獎夙昔自省寔不皇寧重念臣間因奏對每及久任謂祖宗時為學士者常至數歲亦有踰一紀者以此見聞臣非不戀清華之直企前輩之風但文翰之職精思為主今臣福過灾生罹此疾恙既妨思慮遂曠職業雖欲冒尸榮祿勢不可得欲望陛下特賜矜憫畀臣一待闕小郡或在外宮祠差遣冀憑天造休養療治他日倘或有瘳尚能歌誦聖主之功德以畢微願干犯鈇鉞臣無任跼蹐俟命之至取進止

不允詔

勅某省所奏劄子乞一待闕小郡或在外宮祠差遣
事具悉朕聞制誥每下人皆謂其溫厚純雅有典謨
風非卿多識前往極究本原安得有文如此玉堂得
人朕心則喜託疾引去未諭厥懷且官當久任此卿
前日之奏也今乃有請何自戾若是乎所請宜不允
故茲詔示想宜知悉

第三乞外劄子

臣輒冒萬死披露腹心控告君父臣以一介踈賤初乏寸長蒙陛下非常之恩致身華要每惟用過其分未嘗頃刻自安緣此心氣舊疾乘以大作近者懇祈外補盖非獲已伏蒙聖恩特降詔不允臣感激殊遇加意調理冀獲痊愈少副任使而所服之藥多是涼劑數日以來吐利俱作晝夜無度見今用醫生鄒煜吳敏修二人診視雖霍亂少止而心脾痛楚全不入食支離倦乏其勢決非一朝一夕所能安愈翰苑獨員決致妨廢職事重

連罪戾欲望聖慈念臣賦分涼薄受祿滿盈馴致灾迤
將遂隕越特畀外祠或待闕小郡使之保全餘生他日
苟未填溝壑尚當粉骨碎身仰答鴻造疊犯天威罪在
不赦臣無任戰慄俟命之至取進止

七月一日午時當
時批出依已降詔

不允不得
再有陳請

第四乞在外宮觀劄子

九月二日

臣虔輸肝胆上瀆宸嚴哀誠所迫不暇文飾伏念臣才
無寸長性復懦弱既不能趨事赴功期表見於斯世又

無崇議竝論可裨聖時之萬一獨蒙陛下長養成就屢
加拔擢浸極清華之選天地厚恩未知所以報塞乃自
今春以來心氣舊疾日增月益自度不能任職輒敢頻
數請外聖恩過厚訓諭至於四五雖眷待當世名臣其
禮不過如此臣是以貪戀榮寵尚爾遲回近見一二侍
從相繼遂請乃知臣前者陳辭不力未能仰動天聽妨
賢竊位為臯滋大今朝廷推行內外迭補之制如臣叨
塵最久引去不早其於進退之義已無可言兼以未便

民事見嬰疾恙不敢僥覲州郡欲望聖慈特賜矜憫授
臣一在外宮觀差遣非特使之少贖既往之愆亦昭示
聖主保全微臣終始無已之意他日當摩頂放踵仰答
洪造臣無任激切屏營之至取進止

是日御筆批付中書後省降詔不允

不得再有陳請

不允詔

中書舍人王希呂撰

勅某省所奏劄子乞授一在外宮觀差遣事具悉卿
秉心無競制行以和崇論宏議裨贊乎朝廷高文大

冊發揮乎王度自極清華之選愈嘉趣向之醇胡為
弓祠欲以去國且頻數請外非卿求退之不力而遲
回尚爾廼朕眷留之益隆當知君國相與之誠復在
出入迭補之外其祇予訓無費爾辭所請宜不允不
得再有陳請故茲詔示想宜知悉

奏謝劄子

臣迂愚踈賤蒙陛下拔之衆人之中置之侍從之列恩
重丘山報微毫髮積此憂懼浸成心氣之疾適值舉行

更迭舊制乃敢冒昧籲天冀食祠祿不惟少逭滿盈之責亦免招致人言仰累識擢豈謂陛下推天地父母之仁矜憐無能保護弱植面加訓飭使安厥位旋頒溫詔諭以勿復有請寵恩優禮皆非微臣之所當得雖使赴湯蹈火捐軀委命未足仰報隆施況於尋常文字之職安能自効於萬一敢不矢心自誓別圖稱塞謹此奏謝伏乞睿照

謝免轉官劄子

翰林學士朝議大夫知制誥兼侍讀兼太子詹事兼修國史臣周某朝議大夫試尚書吏部侍郎兼侍講兼同修國史兼權吏部尚書臣程大昌朝散郎新授試中書舍人兼太子左庶子兼侍講兼同修國史臣陳騏朝請大夫權尚書吏部侍郎兼同修國史臣芮輝劄子奏臣等準尚書省劄子以車駕幸秘書省奉聖旨各轉一官者冒膺鴻渥伏積震惶臣等竊惟祖宗時三館秘閣近在端門之內乘輿既可數至故或設醴以待羣臣政和

五年初幸秘書外省紹興載新館閣始有增秩故事至
於開湛露之燕摘雲漢之章光於舊聞則有所待臣等
猥以駑鈍分職三館恭值陛下親屈帝尊下賁東壁屬
饗聖德窺觀宸綫已極榮遇若復兼用今昔之異禮更
進階序深恐不稼取禾或累撝覈之政相與熟慮義當
控免懼瀆天聽不敢各上奏牘伏望陛下愛惜爵秩專
待有功裁抑僥倖始於近列收還前詔俾臣等免貽誚
於公議不勝大幸干犯尊威伏俟誅戮取進止

九月二十三日

午時進御寶批周某程大昌並
降詔不允陳騷芮輝並不允

不允詔

勅某省所奏劄子辭免各轉一官恩命事具悉朕仰
法祖宗崇儒爰幸書林恭閱謨訓庶幾尊行用底承
平之盛卿以高文奧學久儀法從參秉史筆稽之故
寔進階一等何以辭為載披遜牘深切嘉歎所請宜
不允故茲詔示想宜知悉

乞宮觀劄子

十一月

臣輒披誠悃上瀆睿聰臣以孤生蒙陛下簡擢致身侍
從嘗欲畢命馳驅期副任使而臣爰自蚤歲即苦心氣
不寧今年以來其疾益甚職在文字每懼曠廢抵罪戾
曾控告君父冀從外補伏蒙聖恩屢頒詔諭未賜俞允
臣自知無以稱塞日益憂惶外雖似乎無它而病寔深
於內每遇撰述徃徃思慮移時僅能下筆蕪類不工衆
所共見而况陛下聖學天縱睿濬日新臣於此久玷代
言之任可謂不知量矣近因回答國書果致語意失當

仰勤宸筆改定臣之不職罪豈容誅緣事干遠人恐傳聞或至失寔未敢入奏待臯便合請對陳情僥倖善罷遭連值假故未有班次不免徑輸危迫之情祈動天聽伏望聖慈矜臣才思殫竭自取悔尤念臣懇求閒散前後非一稍寬刑誅特授一在外宮觀差遣使之歸伏田廬尋訪醫藥他日倘遂痊平誓當再策駑鈍圖報天地父母生成之德臣無任跼蹐俟命之至取進止

十一月
日御

筆批降詔不允
不得再有陳請

不允詔

權直崔敦詩撰

勅某省所奏劄子乞一在外宮觀差遣事具悉卿清
規邁乎朝倫懿文經乎國體久在禁苑具聞嘉猷固
已發吾詔令溫淳安重踵乎訓誥之餘加以禮遇恩
寵在廷莫二而乃懇懇言歸幾於辭竭而意盡豈朕
不敏未達好賢之誠將卿既明自全引退之節莫喻
厥意三復憮然詔旨屢頒勉留毋執所請宜不久不
得再有陳請故茲詔示想宜知悉

奏謝劄子

臣近者擬進金國回書辭意失當憂懼惶惑莫知所措輒敢上章待罪意謂獲譴死矣伏蒙皇帝陛下仁並天地恩踰父師特下詔函諭以不得再請恩禮隆異近無其比驚魂遽定感涕自零臣伏思本朝真宗眷待學士楊億一時羣臣皆莫能及億嘗於契丹回書中用鄰壤二字不契聖意尋引唐制乞行解職厥後竟棄其官犇歸陽翟今臣視億之才無能為役而鹵莽謬戾罪寔過

之陛下既不加之罰反遇之以禮在臣僥倖比億何多
刳心隕元莫報鴻造竭誠盡節誓畢此生謹具劄子奏
謝以聞伏乞睿照

辭免禮書兼翰林苑奏狀

右臣今月四日準尚書省劄子節文三省同奉聖旨周
某可除禮部尚書兼翰林學士日下供職者自天有命
無地措躬臣竊惟掌禮代言班高選遴國初陶穀雖嘗
兼領然宗伯猶是階官未率屬也元祐中獨蘇軾文章

學問稱此兩職然亦先後迭居不聞並命自紹興至於
乾道沈與求孫近胡交修楊椿汪應辰俱是六卿祇帶
兼權學士有以見名器之重不輕畀付如此今臣至愚
極陋無一可取積繇遭遇徧歷清華懷感恩之意而口
不能宣堅報國之誠而力不能逮前此奏對每及祖宗
時居內制者大率久任則臣拳拳之志粗亦可推第緣
宿恙侵凌未免僥求閒散陛下海涵天覆已極隆寬乃
復過有褒遷超視二品直兼翰苑度越前規寵厚而愈

加位高而益進方聖主大開公路臨照百官何乃眷私
小臣獨用其至此臣所以既懷滿盈之懼又慮仰玷聖
明漚懇籲天殆不容已伏望睿慈鑒臣悃悞非敢禮辭
特頒詔旨亟寢成命清資異數留待奇才庶安危衷迄
荷保全之賜所有恩命臣未敢祇受伏候勅旨

御寶批
降詔不

不允詔

崔敦詩撰

勅某省所奏劄子辭免新除恩命事具悉朕惟五禮

管乎羣情八座高於邇列若乃中朝有大著作而無
所折衷諸儒有異議論而未知適從維時太宗伯之
官豈同常有司之事卿以道德名望之彥首言語侍
從之聯百王憲度靡不該通一代典章俱成誦記庸
副朕選誰逾汝宜茲趨陟於新班復乃歸於舊直進
趨內禁敷雷風鼓舞之辭退踐中臺乘夙夜寅清之
節宜祇寵遇毋執謙懷所辭宜不允

謝表

臣某言伏奉詔命除臣試禮部尚書兼翰林學士仍賜對衣金帶魚袋鞍馬者宗伯綴文昌之坐已高曳履之班翰林依華蓋之星尚玷演綸之直當聖主謹持於公器獨愚臣常愧於私人臣某中謝臣竊考自古俊英之才旋觀當今文學之士或抑厭草茅之下或陸沉州縣之中瞻城南尺五之天致身無路想玉階方寸之地通籍幾人況乎出入禁嚴周旋侍從論思獻納日邇清光被衣服乘歲叨徽數向匪員一時之望安能符衆論之

公如臣者學不足以知方才不足以應務家壁四立甘
為窮陋之民君門九重敢起躋攀之念而自親逢聖作
首奉詔除簡知獨厚於諸臣獎擢徧更於華貫官益崇
而效寡祿愈富而報微左降固宜右遷何有忽拜便蕃
之命疊加優異之恩帥屬春官光貳卿之舊次摛文禁
苑忝四命之新榮煥寶帶以章身飾綉鞞而華駿正使
寔兼數器尚虞稱塞之難矧伊初乏寸長何意超踰之
甚周章就列俯仰懷慙此蓋伏遇皇帝陛下道協舜華

志恢禹跡明明在上雖洞照於羣情浩浩其天每包涵
於萬類寧稍捐於爵秩恐或棄於菲葑遂致凡才亦塵
顯仕臣敢不悉具思慮稱是寵褒號令文章期助漢家
之制討論潤色勉晞鄭國之賢苟追素餐豈酬洪造臣
無任

舉自代奏狀

右臣伏覩朝奉郎新通判邵州軍州兼管內勸農營田
事周因問學登甲科才猷著於仕路嘗治兩邑脩宣愛

民捍寇之勞久沉下僚涵養益富使居禮樂文章之任
必有可觀舉以代臣寔允公議

東宮賀冬牋

氣隨卦應象初起於中孚月與日同厯並書於甲子萃
休符於聖旦鍾景況於儲明中賀恭惟皇太子殿下盛
德被躬至仁成性問安視膳欣主景之踐長遠佞親賢
對陽剛之來復自天有相與國無疆某四逢小至於承
華何裨羽翼三祝大來於純嘏益顯暉光懇懇之誠拳

拳於是

淳熙六年

東宮賀正牋

象測璿衡載齊於七政書開寶典重紀於上元繫時令
之更端宜春宮之集祉

中賀

恭惟皇太子殿下生知仁

孝日就聰明內殿捧觴不必馳漢家之道中心愛物奚
須放趙國之鳩茂臨獻歲之期丕擁自天之祐某欣逢
首祚猥綴下僚淵冲玉裕之姿並新厥德栢葉椒花之

頌彌罄乃誠

謝御書劄子

十一月二十五日

臣適蒙聖恩召至選德殿面賜訓諭欲以御書光寵下
臣尋準中使李裕文傳示聖旨頒賜唐白居易七德舞
七德歌一軸龍蟠鳳翔眩駭凡目仰惟皇帝陛下睿文
英武同符太宗選用將相內修政事將欲定兩京致太
平故有感於居易之言形諸翰墨少見聖意抑臣何幸
乃祇拜此賜昔本朝太宗皇帝以宋玉大言賦賜蘇易

簡哲宗皇帝以白居易紫薇花詩賜蘇軾皆所以寵待
詞臣垂光簡冊今臣榮遇殆且過之謹當十襲珍藏傳
示子孫侈遭逢之盛其於報塞惟誓糜捐謹具手劄奏
謝伏乞睿照

謝賜新茶奏狀

二月

右臣今月三十日承中使李肅傳奉聖旨賜臣出格新
茶二十夸者進紫筍之茶及清明之宴自唐而後奉先
為先寧容蟻蝨之臣首拜雲天之渥想旗鎗於閩苑生

羽翼於丹丘翰林分成象之春事光前代常伯待頭網
之賜寵過本朝恩重丘山感深肺腑臣無任榮懼之至
謹錄奏謝以聞謹奏

辭免日厯轉官奏狀

右臣準尚書吏部牒近修日厯至淳熙四年奏知篇秩
以已降聖旨臣曾預脩纂係在內官合轉一官者臣聞
命若驚措身無所竊以堯授舜禪光華二典之中武承
文謨度越三王之上久罕聞於並世今親值於同時蓋

國家甚盛之規定儒學難逢之會而臣猥繇薄技久竊殊知供奉螭坳預初載史臣之高選周旋麟省窺兩朝厯日之宏綱逮茲荐履於禁嚴適遇再陳於篇秩故四周於歲律而疊進於官榮夫何總覈之朝有此便蕃之寵自猶知其過矣人豈謂之當然伏望陛下天造無私日光必照念臣遭逢千一雖與衆同察臣僥倖再三則惟已獨或遂寢出綸之命或量裁考績之年稍令私義之安寔賴公朝之賜所有恩命臣未敢祇受謹錄奏聞

伏候勅旨

弓外祠劄子

臣輒殫誠懇冒干淵聽伏念臣奮身寒苦始望不過州縣一官豈圖天幸蒙被聖主非常之知出入清華十有八載凡學士大夫夢想之所不及者臣既徧歷而久居之矣雖復真才寔能竊恐未易當此況於臣乎是故人以為縈臣以為懼人以為寵臣以為慙戰戰於中不安寢食自外視之步趨應接似若無它而心虛氣索昏忘

困憊日甚一日浸覺不能支吾乃去春以來數有外補之請陛下隆天厚地蓋載小臣屢頒詔諭如待勲舊宗卿禁苑總被優除求去得遷宜黜而陟豈惟自知踰分公論蓋籍籍矣然臣所以冒受而不固辭者欲使中外知陛下待遇臣子極其恩意雖臣不肖無用亦且曲留之於前進擢之於後庶幾智能之士感激奮勵爭效命於聖世此則臣區區體國之素志也今陛下恩意已昭而臣在職又及半載再伸前請今也其時至於位高祿

厚福過灾生數口之家無日不事醫藥近復有殤孫之戚私計怵迫不敢一一控陳於黼座之前抑臣聞犬馬戀軒葵藿傾日臣忝為侍從豈忘斯義若非分量盈溢哀病侵凌懼貽顛沛仰累洪造則輕去闕廷甘心閒散夫豈近於人情伏望陛下日月至明照臣肝胆乾坤宏度恕臣煩瀆檢會累奏除臣在外宮觀一次使之少息憂惶安養神氣三二年間憑藉天恩或未淪於溝壑尚當再策疲駑趨事赴功圖報聖德之萬一輕犯宸嚴臣

無任屏息俟罪之至取進止

五月二日奉御筆批降詔不允

不允詔

勅某省所奏劄子乞檢會累奏除在外宮觀差遣事具悉卿冲規亮節聲榮中朝大冊高文追躡前古越自去歲荐祈外祠所為眷留亦已備盡何未淹於時日又遽上於封章詔下禁林羣聽習聞於溫厚禮行世室諸儒質正於異同固嘗念之疇可去此宜安厥位毋拂予懷所請宜不允故茲詔示想宜知悉

再乞外祠劄子

臣昨日披露腹心乞在外官觀差遣伏蒙陛下面賜訓
獎未俞所請隨頒詔諭回示眷留待遇之恩至深至厚
便當欽承威命勉共厥職仰副聖意緣臣心有未安義
當再攄危懇伏念臣才氣卑弱智識昏愚徒緣遭逢超
取顯美身兼數職寵極詞臣恩施重於丘山報效微於
毫髮論邦法則療官之罪甚大推物理則惡盈之害可
虞是以憂懼積於中寢食廢於外鬚髮衰白心志凋零

若不力求退閒恐必坐貽隕越慮之既熟方敢控陳況
侍從之臣更迭出入聖朝令典無歲無之今臣名為引
去之言寔貪非分之寵閱時滋久觀德謂何故欲及罪
戾未深之時疾病可療之際少圖休息苟逭誅夷伏望
聖慈亮臣素願之無它念臣真情之可憫特頒睿旨許
奉外祠臣迫切於中辭不達意干犯旒宸無任惶懼之
至取進止

五月四日三省同奉聖旨依
已降詔不允不得再有陳請

奏謝劄子

臣近者迫於衰疾冒昧陳情冀就退閒少安孤迹伏蒙
陛下推天地生成之德擴父母愛憐之心未容歸卧於
漳濱尚使參華於魏闕顧慙小醜曷稱大恩臣已遵稟
聖訓於初六日祇赴朝參訖續容請對控陳感戴兢惶
之意謹先具劄子奏謝伏乞睿照

辭免東宮轉官奏狀

右臣伏覩四月二十四日勅下禮部皇太子講禮記終
篇官屬特轉一官者得非所宜以懼以恐臣聞古者教

世子必以禮樂禮所以修外樂所以修內然後恭敬溫
文之德脩焉三王有道之長寔本諸此陛下稽古垂訓
日命儒臣講戴經於東序以助成儲德可謂同符三代
矣而臣叨塵近列參侍承華慙無寸長可補三善逮逢
卒業彌愧橫恩且臣寄祿之階寔崇增秩之寵沓至豈
特僥倖頻數慮貽身灾亦惟賞或僭差殆將累國伏望
陛下推明主愛嚬笑之義念名器不假人之言毋刻贊
書留勸功效蓋以例而加者上之恩也因辭而輟者臣

之幸也授受兩得庶其在茲冒瀆宸聰臣無任戰汗之

至謹錄奏聞伏候勅旨

五月 日奉御
寶批降詔不允

不允詔

勅某省所奏辭免皇太子講禮記終篇官屬特轉行
一官思命事具悉朕惟元良根本之重固嘗博求名
德之彥以輔翼於東宮卿稟資直方蹈道醇正朕所
簡注俾位端尹而能敷繹古今講明法度開益德性
日以高明朕甚嘉之昔元榮以儲君專精博學謂之

國家福祐今經告訖篇例進官等亦惟國體所繫且以誌朕心之喜尚何辭焉所辭宜不允故茲詔示想宜知悉

乞宮觀第一劄子

臣輒瀝肺肝投誠君父內循僭越如蹈淵谷伏念臣至愚極陋本州縣之凡材不自意蒙被聖知揚歷華近常欲策勵駑蹇少效萬一而才分所局勉強不前惟有飢馘之文是臣少習深欲以此圖報天地生成之德而用

意闕 心氣日損事多廢忘動成謬誤晚夕憂懼寢食
為之不安今夏嘗披露懇懇僥冀祠祿伏蒙陛下曲頒
詔諭感極至於無言尋以宗祀涓休許臣驂乘竊惟久
濶之盛典稀世之榮遇周南留滯太史所嗟臣寔何人
乃幸遭際是以遷延累月未敢申言今者熙事告成神
人懽懽若復貪戀榮寵久而不去誠恐舊疾沉痾有加
無瘳討論潤色緩急或至閣筆公言可畏邦法難逃是
時陛下雖欲保全亦將無及此臣所以不避鈇鉞冒昧

有今日之請伏望聖慈檢會累奏授臣一在外宮觀差遣庶使方寸獲安宿恙稍愈則臣殺身圖報何敢後於衆人陳情籲天恭俟威命臣無任戰汗之至取進止

不允詔

中書舍人鄭丙撰

勅某省所奏劄子乞檢會累奏授一在外宮觀差遣事具悉朕惟儒術行而天下富有德進則朝廷尊卿以淵源之學啟迪朕心黼黻之文光華國典久服禁嚴之列寔深注委之懷何為抗章累求去位況才具

優兼於數職春秋尚盛於中年以疾為辭誠所未喻其體至意勉為朕留所請宜不允故茲詔示想宜知悉

乞宮觀第二劄子

臣昨日罄竭愚衷冒塵淵聽乞一宮觀差遣伏蒙陛下訓諭再三未忍使之遽去且謂臣自試詞科已簡聖知臣上迫天威中銜恩遇精誠雖至辭不寫心退朝跼蹐恭俟報可豈謂鴻私優假溫詔復頒捧讀以還感極而

泣因竊伏思陛下所以於臣委曲盡眷留之意者以臣
進由科目粗習文藝欲令常周旋於翰墨間也臣亦知
本朝故事內制學士多是十有餘年未嘗輕為去就自
可優游侍從展盡底蘊極書生之榮願何至固守不移
之愚以自納於不測之誅蓋由臣宿苦心氣年運而往
日以加甚舊書廢忘無復新功臨文之際屬思艱苦辭
皆牽強常恐緩急宣鎖不能成章玷辱國體無所逃罪
是以仰恃殊知思欲自為之所又念聖時難遇餘生可

惜及今少圖休息免至遂為廢人異日尚堪奏薄技於從官之內或捐軀命於矢石之間天不可欺臣何敢忘伏望聖慈俯加憐察特賜矜許意迫言繁荐瀆君父臣無任戰栗俟罪之至取進止

御筆批依已降詔不
允不得再有陳請

奏謝劄子

臣昨再具劄子乞在外宮觀差遣準尚書省劄子脩奉聖旨依已降詔不允不得再有陳請伏念臣蟲豸才微鉅器小用過其量每深滿溢之憂病乘其衰浸覺精

神之耗輒籲天而伸懇方伏地以俟誅敢圖推博愛之仁未忍徇投間之請洊頒恩旨曲示眷留傾葵藿之心彌堅此日逐桑榆之暖猶待他時臣無任感激惶懼之至謹具劄子奏謝以聞伏乞睿照

繳還殿中監職事申狀

近準勅差充將來會慶聖節上壽殿中監職事緣某先曾借官就都亭驛押宴竊慮至日人使在廷衣帶相妨所有原差勅一道并封皮今繳連在前伏候指揮仍連

元勅一道并皮

十月七日三省同奉聖旨依改差刑部尚書謝廓然其繳其勅令尚書省毀抹

明堂禮成賀東宮劄子

某等恭覩聖上肇禋明堂精意昭格積雨驟霽迄於熙成神人歡欣中外闔懌亦惟殿下顯相君父慈伸貳觴之敬用能助輯休祉敷為慶澤天下幸甚

未即詣東宮劄子

某等伏慮連日行禮稍勤未敢趨詣宮庭謹先此稟叙賀悃伏乞今照

會慶節賀劄

臣恭遇會慶聖慈緣被旨二十八日借官押宴都亭驛
不獲拜舞鴛鴦之行伏願皇帝陛下睿算萬年奉庭闈
之榮養綿區一統包唐虞之舊疆永裨生民常躋壽域
臣無任瞻天樂聖懽呼頌詠之至

辭免吏部尚書兼翰林學士承旨奏狀

右臣今月二日準尚書省劄子三省同奉聖旨除臣吏
部尚書兼翰林學士承旨日下供職者寵光下集感懼

中深竊以文部設官卿列三銓之首禁林分職命專一
老之承諒非望寔之交乎安得恩榮之並授如臣者性
資昏鈍問學荒蕪綿力薄材事業每居於人後高官厚
祿選除常在於衆先分毫未答於殊知積累更多於幸
會儀曹再至禮文獲預於討論翰苑重游典冊屢參於
潤色已溢鉅罍之量方隆天地之恩外朝高南省之班
內直冠北扉之秩求閒而劇既難強於精神宜退而遷
亦思招於議論思道貪饕之誚寧干逋慢之誅伏望皇

帝陛下明君知臣慈父愛子察臣吏才素短詎應付之
銓衡憐臣筆力已衰難復責之翰墨收還異數改畀寔
能庶幾毛玠之清可踰於魏母使鄭綯之密獨見於唐
仰瀆四聰伏湏萬坐所有恩命臣未敢祇受謹錄奏聞
伏候勅旨

不允詔

崔敦詩撰

勅某省所奏辭免除吏部尚書兼翰林學士承旨恩
命事具悉綜銓省之公衡道內庭之密命攷皇朝熙

寧而上寔為台路之官閱唐室元和以來專待禁林
之老班高地近事重職清曾崇朝而並除乃曠代而
罕見卿懿文追古亮節表時英英人物之宗憲憲邦
家之望久在禁林灼知俊心稔光大之德而尊榮朝
廷藉端醇之度而領袖侍從優賜顯渥夔超常倫當
即欽承毋庸過遜所辭宜不允故茲詔示想宜知悉
再辭免兼翰林學士承旨奏狀

右臣近具奏辭免新命伏蒙聖慈降詔不允臣仰戴恩

遇已蒞事訖惟是詞禁兼榮至為優禮非臣么麼所能
稱塞方欲再伸懇悃乞賜寢免茲者恭覩內批付學士
院以天官事繁今後非特旨撰述其餘並免臣有以見
陛下眷待微臣曲盡恩意並陞兩職示寵措紳復蠲減
撰述寬其思慮剗心隕元何足仰報洪造然臣竊謂優
異之禮須待俊傑之人若以凡材而輒冒受衆將指議
自爾難安且祖宗時學士兼知開封或領三司使免撰
述者蓋是朝廷差委別領職任有妨赴院非推異數以

便其私也官制既行六曹尚書多除翰苑如蘇頌累朝
舊德自刑部尚書改授吏書始除承旨豈嘗疊組並進
仍免常程文字如臣今日之優異僥倖乎伏望陛下矜
臣惶恐不敢當之意許臣免兼承旨學士使得殫竭智
慮効力銓綜以圖報答不惟私義稍安亦於公論惟允
干冒宸嚴臣無任戰懼俟命之至謹錄奏聞伏候勅旨

不允詔

崔敦詩撰

勅某省所奏辭免兼翰林學士承旨事具悉朕閱唐

故事翰林置承旨自鄭絪始凡大誥令大廢置乃俾
專受不責以翰墨之勞也本朝以學士久次一人為
之秩高體重固不常置卿久在禁林多歷年所宜峻
厥陟用休其勞況綜秉銓衡叙進羣吏亦已詔卿免
凡撰述惟特命始預畧如唐制矣金門玉堂方倚君
重宜無辭焉所辭宜不允

第三辭免兼翰林學士承旨劄子

臣近再具奏辭免兼翰林學士承旨伏蒙聖慈特降詔

不允恩私隆重踰於丘山便當祇體聖意何敢固辭飾
避然臣竊念分直禁林寔為高選服勤文字乃其常職
若驟進久虛之位仍加優逸之禮恐雖宿儒舊德不敢
偃然當此臣是何人輒敢冒居縱陛下寵遇微臣公論
必不容恕而况經筵史觀東宮僚屬比之同列兼職已
多伏望聖慈察其情不自安懼速顛沛特賜矜憫許免
上件恩命臣誓竭犬馬之力圖報天造取進止

十一月
九日三

省同奉聖旨依
已降詔不允

謝表


臣某言伏奉誥命除臣試吏部尚書兼翰林學士承旨
仍賜對衣金帶魚袋鞍馬者頻年入侍徧塵清近之班
兩職並陞復冒殊尤之寵賁服章於朽質被鞞策於名
駒異渥鼎來危衷震惕臣某中謝臣聞漢以尚書為喉
舌唐以翰苑為腹心明光畫省之嚴夔龍接武浴殿金
鑾之邃頗牧在中凡預選掄已為要劇矧疊膺於印組
足增耀於簪紳如臣者天分弗高人才甚下自惟始願

不踰州縣之間誰意晚塗寢躡賢豪之上揆分数祈於
罷免䟽榮更誤於褒遷冠秩序於南宮進班聯於東閣
胡瞻鵠特久慙受祿之無功兼取熊魚彌愧舍生而取
義二儀施大一介命輕此蓋伏遇皇帝陛下文武生知
聖神廣運使人也噐隨良窳以無遺與物為春舉根莢
而畢遂是容賤士仍黜高門惟聖朝法令之具存初不
勞於鑒裁而明主功德之俱懋亦何待於論思第當守
三尺以不欺且復盡一心而無隱庶持孤節仰報鴻私

臣無任

舉自代奏狀

右臣伏覩宣教郎簽書鎮南軍節度判官廳公事孫逢
辰才能之優可剗繁劇文學之敏宜脩咨詢臣實不如
舉以自代



文忠集卷一百二十四

欽定四庫全書

集部
文忠集卷一百二十五
六

詳校官庶吉士臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣李如梓

欽定四庫全書

文忠集卷一百二十五

歷官表奏四

宋 周必大 撰

淳熙七年

東宮賀年牋

正合乎天謹歲年於周朔雷潛乎地推動靜於羲爻在
時為亨於禮宜慶中賀恭惟皇太子殿下徇齊以敏溫
敬而文日月就將方懋聰明之德國家閒暇莫窺監撫

之功當南極之景舒知少陽之道長榮奉兩宮之樂協
臻曼壽之祺某託脩下僚會逢亞歲龍墀北拱欣仰睇
於淵冲鶴禁東開嗣虔修於班謁

同講筵官辭免進讀三朝寶訓終篇轉官奏狀
太中大夫試吏部尚書兼翰林學士承旨兼侍讀臣周
某朝議郎試兵部尚書兼侍講臣王希呂朝議大夫權
尚書戶部侍郎兼侍講臣陳峴朝奉大夫侍御史兼侍
講臣黃治朝奉郎秘書省著作郎兼崇政殿說書臣崔

啟詩同狀奏臣等昨準尚書省劄子五月六日三省同
奉聖旨經筵進讀三朝寶訓終篇侍讀侍講說書並特
轉一官者非常之恩承命震恐臣等伏覲真宗咸平中
肇正講讀之職始命邢昺專講左氏春秋其後篇帙既
竟特宴近臣仍有賜賚遷官之寵載在史冊以為美談
仰惟陛下廸三聖之丕烈頻御邇英樂聞謨訓臣等適
有天幸偶值終篇聖恩所加務極隆厚賜飲則勅使踵
至賚予則駢蕃不一臣等無稽古之力竊稽古之榮其

為光輝已不勝言若復驟增顯秩必將上累信賞下拂公議此臣等之所以懼也且邢昺初終自講一經宜有異數今畧計十九年間任講讀者近六十人曾非獨勞乃掠衆美此又臣等之所以懼也伏望聖慈矜憐危懇原省罔功因其旅辭特格前詔庶幾僥冒之責猶追於萬一臣等無任虔祈戰汗之至謹錄奏聞伏候勅旨

五月

十二日三省同奉聖旨並不允
內周某王希呂令學士院降詔

不允詔

王希呂同

勅某省所奏辭免經筵進讀三朝寶訓終篇特轉一
官思命事具悉朕聞恭惟舊所以迪順民之方擇儒
人所以廣多聞之智誕惟三聖炳德六經思紹述於
猷勲廼周爰於殫洽卿夙儀禁闥咸擅才謨進聯講
幄之華脩罄幾音之助甫終篇第宜有褒優夫推朕
顯尊祖宗之心故凡今經綸訓典之彥趣加蠲賞式
示至公非爽舊章母稽成渙所辭宜不允

申省狀

右某等近蒙聖恩以進讀三朝寶訓終篇特轉一官尋具奏辭免未奉俞旨不勝震灼竊惟明主日御經幄咨詢聖謨右文之勤中外嘆仰某等分日誦說豈嘗宣勞乃緣特恩躡進階秩遠攷咸平之制既已不同近觀紹興之時又無此例逢辰雖幸冒寵何名伏望朝廷特與敷奏許賜寢免庶安私義免累公朝某等寔為厚幸謹具申尚書省伏候指揮

五月十五日三省同奉聖旨周某王希呂依已降詔陳峴黃治

崔敦詩依已降指揮並不允不得再有陳請

進謝恩詩表

少傅保寧軍節度使醴泉觀使兼侍讀衛國公食邑一萬一千五百戶食寔封四千九百戶臣史浩太中大夫試吏部尚書兼翰林學士承旨兼侍讀兼太子詹事兼修國史管城縣開國伯食邑八百戶臣周某朝請郎試兵部尚書兼給事中兼修玉牒官兼侍講符離縣開國男食邑三百戶賜紫金魚袋臣王希呂朝議大夫權尚書戶部侍郎兼詳定一司勅令兼侍講閩縣開國男食

邑三百戶賜紫金魚袋臣陳峴朝請大夫起居郎兼太子侍講臣木待問朝請郎守起居舍人兼玉牒所檢討官臣宇文价朝奉大夫侍御史兼侍講臣黃治朝奉郎秘書省著作郎兼學士院權直崇政殿說書臣崔敦詩上表臣某等言伏蒙聖恩以進讀三朝寶訓終篇賜臣等御筵及牙簡金帶硯匣鞍馬香茶者侍言虎觀陳三聖之宏規錫宴麟臺講一時之盛禮匪頒意厚宜勸恩深既怙冒於榮光宜發揚於歌詠臣浩等

中謝臣等伏

以皇祖有訓嘉言孔彰開創守持垂億萬年之基業都
俞吁咈定六十載之綱條皆聚此書克昌厥後而臣等
讀慙左史時際右文獲並造於細旃敢妄希於重席徒
緣幸會猥被眷私屬饗肴核之豐眩駭鼓鐘之奏裏蹠
象齒第分御府之珍駿足凋鞍均拜天閑之賜載盼貢
焙申錫寶薰豈伊極陋之姿堪此殊常之寵茲蓋伏遇
皇帝陛下緝熙帝學闡繹人文誦上世之遺書寧專耳
受監先王之成憲固欲躬行逮訖華編特推飫賜儒流

改觀識咸平慶厯之遺風政路偕來兼元祐紹興之故
寔若時曠典增渙昌期臣等積愧優恩粗知美報蓋九
五正大君之吉象已應於雲需則羣黎祈萬壽之增詩
必賡於天保臣等無任感天荷聖激切屏營之至謹各
齋沐撰成謝恩詩隨表上進以聞

同侍從慰皇子魏王薨奏

臣等恭承皇子薨背仰惟聖情良切悲悼伏乞以理寬
釋俯慰羣心臣等無任虔懇之至

乞宮祠劄子

臣輒控愚誠仰干洪造伏念臣再塵禁路六閱歲華課
績用以蔑加冒遷陞而寵甚邦彝具在久踰更迭之時
物理可推寢昧滿盈之戒昨繇宗伯改領選曹獻納論
思曾微片善簿書期會初乏寸長仰負眷知俯慙譏誚
又遷延於半載乃冒昧而一言正惟固戀於恩榮是以
弗輕於去就茲緣疾恙驟覺衰疲內無可展之才猷外
則弗強於筋力省循頑頓合致人言恃賴隆寬尚容自

列伏望陛下軫念軒墀之舊擴施天地之仁許奉外祠
俾逃大戾性如麋鹿期少遂於山林效若犬雞終再伸
於鳴吠臣無任祈天俟命惶懼激切之至取進止

不允詔

學士院權直趙彥中撰

勅某省所奏劄子乞奉外祠事具悉朕惟儒者之在
朝有若大山之蘊玉雖沉潛美不見外然光潤發越
者多卿履德清純受才淵茂敷言華乎邦國端誠儀
於朝廷嘉惟節業之修蔚為侍從之倡粵升銓綜之

冠具有忠勞之宣事經畢陳官序惟穆屬小愆於衛
養旋既遂於寧瘳胡輕抗言謀欲自佚況比進金華
之讀正以便細旃之咨廼鴻碩之弗留豈僉與之歸
允勉安厥服毋拂至懷所請宜不允故茲詔示想宜
知悉

再乞宮祠劄子

臣昨日於經筵留身以疾病之餘不勝疲憊乞奉外祠
蒙陛下天語溫粹曲形慰勞且謂寶訓終篇一時盛典

卿豈不體朕眷禮之意臣惶懼感激莫知所措尋具奏
陛下用臣太過遂致滿溢挺災劇曹要官非養疴之所
清資駢組積妨賢之愧知進不知退有害盈之悔若復
貪冒榮祿必將重速顛危伏緣駕坐已久臣之惓誠未
容殫竭退而屏息俟命不謂俞音尚闕詔旨隨頒恭惟
隆天厚地之恩何以稱塞自合仰承眷遇豈敢固守不
移之愚其如寔迫病衰勢有不能但已伏念臣踈庸懦
弱畧無寸長一自移置銓曹寵任彌劇朝思夕慮每不

皇安屈指計日只俟附近半載即上章丐去臣之素志
同列具知已定此月十二日乞對矣會瘡腫在告旬浹
私念忝陪近侍安可以疾卧家徑入文字故就二十三
日勉強祇赴朝叅尋曾奏知只候有班次便伸懇款以
此見臣犬馬戀軒反覆籌度非驟為是請也天日在上
一言敢欺伏望聖慈俯賜矜察特從所請臣投間之後
若遂忘報國則何以自立於覆載之間刳心隕元期在
他日疊犯天威臣無任戰慄祈懇之至取進止

御筆批
依已降

詔不允不得
再有陳請

奏謝劄子

臣比緣瘡腫頓覺衰羸兼恐從駕過宮乘騎未得是敢
籲天有請願遂投閒恭值皇帝陛下日御金華憲章寔
訓念臣昔叨侍立於開講之始今忝進讀於終篇之時
疊承詔音未許其去恩私加厚糜隕難酬臣謹當遵稟
聖訓直俟榮觀盛禮之後別伸丹悃謹先具劄子奏謝
伏乞睿照

辭免參知政事劄子

臣今月十七日準尚書省劄子奉聖旨除臣參知政事
特降中使宣押赴都堂治事者成命初傳衆聽俱駭微
臣自度兢懼可知仰惟皇帝陛下宵旰圖治規恢大業
謂凡立政造事折衝消萌無非以人才為本故雖有列
於朝聖心罔不遴選而况附股肱以承元首裨棟梁以
安大厦號為執政非他官比選用之際豈容或輕伏念
臣以章句腐儒叨塵侍從受恩踰於山岳圖報微於絲

毫揣分量能方祈罷免敢圖殊擢躡政機是使瓶罍
之器汲萬斛之泉疲駑之馬負千鈞之重其滿溢顛覆
可立而待也伏望聖慈察臣么麼不可大受亮臣悃悞
非曰小廉別求真材庶允公議且國朝進用二府固有
定論而亟改制出而復收蓋以選衆為重而反汗為輕
也冒輸危懇必冀矜從臣無任懇祈激切俟命之至取
進止

不允詔

崔敦詩撰

勅某省所奏劄子辭免參知政事恩命事具悉蓋聞
至治之世俊人在上下及虎賁趣馬左右携僕罔不
惟正之擇濟濟之風民視以化而況二三執政之臣
圖翊大務考審所與其可以輕朕懋師古道以卿智
器雅厚機神穆遠沉潛經德之粹鮮明固守之節揚
歷二禁藹然日章肆庸應嘉爰究爰度宜績之事登
陪政塗朕之用卿迹觀已素卿其思報奮勵所為毋
事撓文而留允令所辭宜不允

辭免參知政事表

臣某言伏蒙聖慈以臣辭免初除參知政事恩命特降詔書不允者疑丞任重方陳控避之言神聖恩隆遽下往諧之詔揣分知逾於始望輸誠敢緩於終辭臣某中謝伏念臣猥以孤生際於興運久趨龍尾親依日月之光盡上螯頭畏懼雲霄之逼顧才力何裨於當寧乃眷知特異於在廷駭進用之非常殆周章而失措蓋禁路論思之責尚惕若以難安矧政塗密勿之機敢偃然而

參預伏望皇帝陛下知人堯哲徧物舜仁念愚臣之靜
言或違於用思治世之先務莫急於賢別求四近於具
瞻母為一夫而輕假臣若得姑仍舊貫弗玷新榮則當
精思竭慮於翰墨之場履正奉公於銓衡之地庶酬洪
造抑遂素心臣無任祈天俟命激切屏營之至謹奉表
陳免以聞

批答

崔敦詩撰

省表具之朝廷延登常取羣望廊廟重任宜聳具瞻

楊綰用而宿貴改觀王陽進而善士生喜朕選建碩
輔翼宣大猷國皆曰賢政將焉避卿初終有守本末
無疵以其縝密而栗可以參討謨以其中正而通可
以經丕務俾釋銓管遂躋柄途人之信道固將有行
國之用儒時維克允猷為滋始遠近所觀方朕衷委
重之意深亦衆志望賢之責脩勉據素蘊汔濟熙圖
謙避之章止母來上所辭宜不允仍斷來章

批答口宣

朕選求人望參翊政幾當成命之方行已金言之維
允亟恢賢業遂畧謙章

謝參知政事表

臣某言伏奉告命除臣參知政事尋具辭免伏蒙聖慈
特降中使賜臣不允批答仍斷來章者論思無補盍退
屏於丘園圖任有加俄進陪於廊廟牢辭弗獲冒處為
慙臣某中謝臣竊觀歷代人材之興全繫時君心術之
致未有蛟龍翔而雲霧不應未有元首明而股肱弗良

事漢宗臣皆秦室無聞之吏興唐碩輔率隋朝未遇之人上既有任賢使能之方下固多奉令承教之佐患弗求耳夫何遠而矧堯舜之相傳宜夔龍之接武豈無俊傑可助弼諧如臣者器識卑凡藝能譎薄幸遭逢於初政蚤塵汚於近班陛下非不作成而臣無可教之質陛下非不策勵而臣有弗移之愚然猶處之詞禁之高華試以文昌之繁劇每示眷留之寵屢形進用之言蓋覆燾之中舉無棄物而照臨之內悉耀末光是容一介之臣

亦綴三卿之後腹心所寄頂踵奚酬茲蓋伏遇皇帝陛下聖哲生知德功日起五帝其臣莫及方獨運於宏模四方宣力汝為抑旁資於協濟既將博採寧免兼收顧慙極陋之姿恐負延登之意臣敢不勉殫厥力思稱所蒙禹臯益稷之三謨難窺大訓韓范富歐之四傑或企前修臣無任

謝太上皇帝表

臣某言伏奉告命授臣參知政事者朝有四鄰寔聞國

論臣無一善虛冒恩除揣愚分以非宜愧師言之弗稱

臣某中謝

伏念臣奮身下土竊第丁年自入仕於王畿

即受知於聖鑒鑾坡召試金口褒揚許以能文欲其掌

制之援助廟堂之上甘滯留館閣之中會臺察之闕員

簡宸衷而親擢俄逢堯禪獲際舜華滋蒙特達之知徧

厯禁嚴之地方虞幽黜廼誤明揚越繇侍從之聯躡進

疑丞之列雖貪生之類夙仰戴於陶成然太極之功終

莫窺於運用茲蓋伏遇堯壽聖憲天體道性仁誠德

經文緯武太上皇帝陛下仁參列聖道婉三皇稟德謙
冲治定功成而弗有怡神閒燕天長地久以無疆俯眷
孤蹤密恢洪造臣謹當靖共厥位精白乃心思重丘山
曷效兩宮之報誠堅金石第祈萬壽之延臣無任

謝東宮牋

某言先準誥命除參知政事已於今日五日朝謝訖者
青宮他職久進侍於淵冲黃闥聯班忽冒膺於宸渥用
踰分量愧極心顏某中謝伏念某學不足以知方才不

足以應務平生艱拙已絕望於功名中歲遭逢乃參華
於侍從眷言詹省之任時謂政塗之階猥以庸材濫茲
承攝夏絃春誦殆拭目於六年日就月將常傾心於三
善顧待遇獨加於流輩知荐揚時達於睿聽是使迂儒
亦聞大政材如社木疇可助於棟隆味若野芹顧何裨
於鼎寔凌競拜命俯偃懷慙茲蓋伏遇皇太子殿下恭
敬溫文聰明淵懿進而侍膳懋忠孝之宏規居則談經
洞古今之要禮孜孜於善士尤眷眷於下僚逮此超

踰若為稱塞某敢不悉其志慮濟以端良羽翼自成昔
固慙於園綺股肱汝作今尚勉於夔龍謹奉牋陳謝以
聞

辭免正謝賜衣帶鞍馬劄子

臣蒙恩除參知政事今月五日正謝又蒙聖恩賜臣對
衣金帶魚袋鞍馬竊惟賜服所以旌有德錫馬所以待
有功而臣供職之初已經宣賜謝恩之日復冒匪頒豈
容兩旬而忝再命禮雖從厚心寔懷慙伏望陛下察臣

僥倖已多念臣滿盈是懼可以無與使之少安特降指揮追還所賜臣無任惶懼俟命之至取進止

辭免兼勅局劄子

臣準尚書省劄子以參知政事錢良臣辭免兼職三省同奉聖旨差臣同提舉勅令所者臣承詔惕息罔知所措竊惟執政之兼書局初無定例同升或容分領未至奚必曲成今者良臣陳義甚高過於謙遜臣若汗顏代斲獨不愧晉人其下皆遜之語乎況臣鄙樸無能超踰

已甚律設大法懵然弗知將何以助陛下三章之約贊
相臣畫一之謀今早已嘗面奏天聽未回須至再有陳
免伏望聖慈矜臣惶恐不自安之意特降睿旨俯從所
請許仍其舊臣無任懇迫俟命之至取進止

御筆批降
詔不允

不允詔

勅某云云事具悉朕觀國朝循唐舊制凡刪定律令
必以廊廟之臣領之示不敢輕也卿以經術潤皇猷
以智畧斷國務宜以餘力訂吾冊書況今倚任大臣

總正諸事宏章鉅典各奏厥成卿獨袖手於其傍可
乎所辭宜不允

生日詔

勅某金行澄奩玉管流商氣鍾河嶽之英時作邦家
之輔爰推賜式俾介壽祺今賜卿生日羊酒米麩具
如別錄至可領也故茲詔示想宜知悉

羊二十口法酒一十餅法糯酒一十餅糯酒一十
餅杭米一十五碩麩一十五碩

謝表

臣某言伏奉詔書以臣生日特降中使賜臣羊酒米麪者位聯丞轄方豫享於堂封戶紀桑蓬更鼎來於臺饋恩私厚甚報效茫然臣某

中謝

恭惟明盛之朝眷是贊

褒之列記其生育被以寵光詔隨勅使以及門賜出天庖而充宇惟才堪大任斯不愧於養賢惟家有嚴君乃或伸於養志臣於二者舉無一焉尸素積年每愧河檀之刺羈孤多難久纏風木之悲敢圖賚予之榮加責勗

勞之日茲蓋伏遇皇帝陛下惠綏庶品優遇適臣既醉
太平俾興君子之行為羨饗士固異賤官之常所慙驚
鈍之姿莫稱餼牽之禮千鍾弗洎思親養以無從一斛
必酬况君恩之至重毫分可報糜隕奚辭臣無任

旱災待罪劄子

臣竊見邇來諸路多以旱告陛下焦心勞思苟可格天
裕民無所不用其至而時雨未降歲事可虞豫政之臣
自當均任其咎按慶厯春旱治平水災參知政事宋庠

丁度趙槩歐陽修或特從貶降或上章自効民言可畏
故事甚明臣適於榻前已曾奏知今更不敢入局治事
見遷出僧舍待罪伏望聖慈顯行黜免改用賢儔以召
和氣取進止

不允詔

崔敦詩撰

勅某云云具悉朕惟治有大虧斯上千陰陽之變君
為元首豈咎專股肱之臣迺者慘氣浸蕃時澤弗效
場功莫戒民氣罔孚永言致鑒之繇方切在予之責

卿屬參政事之選宜共圖銷復之原奚為抗章援故
去位夫祖宗之制施置之宜慶厯雖畧循漢氏之前
曩治平固無取永平之推咎勉思報國之誼副朕克
躬之誠所請宜不允

乞罷黜表

臣某言伏蒙聖慈以臣引愆待罪特降中使宣押臣隨
班起居奏事畢赴都堂治事仍降詔書不允者伏以上
帝垂恩每篤農夫之慶下臣失職致興旱魃之灾雖眷

憐未置於嚴科在譴罰具存於故寔臣某 中謝 伏念臣
本繇薄技誤結殊知曾微一善之可稱夫豈四鄰之敢
望冒膺擢任常切憂虞永惟上聖之厲精穆卜羣賢而
佐理旋觀近歲浸底泰和無愆伏之陰陽有豐登之稼
穡祇自夏秋之際頻貽宵旰之勞雲屢密而復開膏每
屯而未溥職臣驟進召此旱祥雖日淺位卑敢遽干於
大戾然天時人事似深譴於微臣願以身當庶其衆允
伏望皇帝陛下仰稽天意俯察民情毋嫌大用於前而

廢小懲於後致和消沴必為三日之霖進善黜幽允協萬邦之望臣無任祈天俟命激切屏營之至謹奉表陳請以聞

再乞罷黜劄子

臣昨以兩不時若嘗具奏乞行黜責伏蒙聖恩特降中使宣押隨班奏事臣惶恐感激莫知所措竊伏惟念才薄德輜驟膺晉擢既於人望有所弗協則夫設施議論見於協贊者必多謬盭以上干陰陽之和昔東海太守

斷獄失平猶成旱歲況臣聯班二府豫聞機政積其瘵
曠致沴可知不在乎位序之崇庠任事之久近也伏望
聖慈察臣不敢自恕矜臣無所逃刑早降處分特從罷
斥干犯威尊伏地震栗取進止

御筆

卿等荐陳章奏欲乞罷政事具悉君臣同德以格天
心可也而陰陽不和專咎輔弼此漢之制朕所不取
今偶亢旱時雨未降正宜講明闕政以召和氣乃遽

求去豈朕所望哉當安厥職所請宜不允

東宮賀冬牋

魯觀占雲知豐年之習吉周圭測景驗化日之彌舒百
順脩於皇家多样叢於儲極中賀恭惟皇太子殿下凝
姿聰哲毓德溫文敏學時修嗜詩書之至樂重親日侍
邁忠孝之永圖茂臨亞歲之辰均衍萬齡之慶某久陪
鶴禁密跂龍門家國安榮喜冠古今之治陰陽消長諒
同天地之心欣頌居多贊揚徒費

文忠集卷一百二十五